

АКАФИСТ СВЯТОЙ ВЕЛИКОМУЧЕНИЦЕ АНАСТАСИИ УЗОРЕШИТЕЛЬНИЦЕ

Кондак 1

Избранной угоднице Христовой, всеблаженной. великомученице Анастасии похвальное пение приносим, яко имущей многое дерзновение ко Господу еже от всяких бед, скорбей и болезней свободати верных, и с любовью взываем сице: Радуйся, всеблаженная великомученице Анастасие, узников святая посетительнице и молитвеннице о душах наших.

Икос 1

Ангелом уподобилася еси разумом чистым, познавши Того, Иже есть всего видимаго и невидимаго вечное начало и единый конец желаний всех благочестивых; мы же, восхваляюще мудрое обучение твое от святаго мученика Хрисогона, с любовию вопием ти: Радуйся, возлюбившая веру Христову; Радуйся, последовавшая благочестию матери твоя Фавсты. Радуйся, соблюдшая чистоту девства твоего; Радуйся, всегда невидимо охраняемая Ангелами. Радуйся, чистотою твоею к Богу приблизившаяся; Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 2

Видящи святая Анастасия, яко мнози христиане страдают в темницах за Имя и учение Иисус Христово, начат со усердием служить им, утешати же и целити я содействующу Богу, со благоговением поюще: Аллилуиа.

Икос 2

Уразуме богомудрая Анастасия, яко вся мира сего красная тлению причастна суть, и того ради презревши светлыя одежды и утвари многоценны, тайно оболкшися во одежды нищих, вхождаше в темницы послужити исповедником Христовым; мы же мысленно споследствующе ей, взываем к ней с любовию: Радуйся, подражательнице Христова; Радуйся, посетительнице заключенных в темнице. Радуйся, утешительнице исповедников Христовых; Радуйся, злато и серебро твое на них расточившая. Радуйся, теми стяжавшая Царствие Небесное; Радуйся, руце и нозе святых омывавшая и власы их очищавшая. Радуйся, недуги их врачевавшая и тела их честне погребавшая; Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 3

Силою укрепляема свыше, святая мученице, послужи благочестно святым и посрами ненавистника всякия добродетели диавола, напустившаго рабыню оклеветати ю пред мужем неверным; мы же, восхваляюще благотворения твоя, Анастасие, поем вкупе с тобою: Аллилуиа.

Икос 3

Имущи великую любовь о Господе ко всем, в темницах страждущим за Имя Христово, ея же ради множицею биена бывши от невернаго мужа, напоследок в дому его себе темницу обрете; темже мужеству ея дивящися, вопием к ней: Радуйся, избранная невесто Христова; Радуйся, заповедей Христовых усердная хранительнице. Радуйся, не словом точию, но и делом сия исполнившая; Радуйся, душу свою за други твоя положить готовая. Радуйся, многое озлобление за Христа приявшая; Радуйся, терпением своим адаманту крепкому уподобившаяся. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 4

Бурю ярости своя воздвиже на тя нечестивый мучитель муж твой, яко пленницу и рабу вмени тя, святая Анастасие; мы же, воспоминающе озлобления от него и страдания твоя, поем укреплявшему тя Господу: Аллилуиа.

Икос 4

Слыша блаженная Анастасия, яко много претерпе святой учитель ея Хри-согон за Христа, ему же и последова страданьями своими и тайно восписа ему сице: “Учителю! Чаю умрети и ничтоже ино остается, точию да испустивши дух, паду мертва”. Мы же, чудящися терпению твоему, глаголем сице: Радуйся, не пощадившая плоти своя честная; Радуйся, во дни и в нощи повергавшаяся к стопам Христовым. Радуйся, желавшая расточити богатство твое Бога ради неимущим; Радуйся, мудро куплю деющая. Радуйся, едино имущая попечение о страждущих во узах; Радуйся, невозбранно вшедшая в Чертог Небесный. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 5

Яко боготечная звезда явилася еси в римстей стране, велико-мученице Анастасие, посещающи страждущих за Христа в темницах и сердца их в вере утверждающи, да присно взывают с тобою Спасителю всех Богу: Аллилуиа.

Икос 5

Виде тя богоносный учитель твой Хрисогон в смущении и волнении мира сего сущу, повеле с пророком взывати тебе: “Вскую прискорбна еси, душе моя, и вскую смущавши мя, уповай на Бога”; мы же, поминающе скорбь и печаль твою яже по Бозе, зовем ти: Радуйся, возложившая все упование твое на Господа; Радуйся, претерпевшая тесноту Царствия ради Небеснаго. Радуйся, чистою твоею со ангелы жити на небесех сподобившаяся; Радуйся, скорбьми твоими к Богу приблизившаяся. Радуйся, молитвами твоими избавляющая нас от многих скорбей; Радуйся, ходатайством твоим свободяющая от искушений. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 6

Проповедует весь мир христианский честныя подвиги твоя, великомученице Анастасие, и страдания твоя славит, мученическую кончину твою ублажает и поет Богу: Аллилуиа.

Икос 6

Возсияла еси паче солнца добродетельми твоими в великом граде Риме, егда исполнися предречение учителя твоего святаго Хрисогона о погибели безбожнаго мужа твоего. Свободна бо сущи, с вящим усердием начала еси пещися о мученицех Христовых; мы же, взирающе с любовию на деяния твоя, глаголем ти сице: Радуйся, усердная помощнице страждущим; Радуйся, божественными словесы утешавшая друзей Христовых. Радуйся, имевшая велие попечение о трех девах: Агапии, Хибнии и Ирине; Радуйся, тех на подвиг мученичества укрепившая. Радуйся, ум твой горе имевшая; Радуйся, сердце твое жилище Святаго Духа соделавшая. Радуйся, огнем любви к Богу всецело возгоревшая; Радуйся, в крове крил Его небесный покров обретшая. Радуйся, мужеством твоим врага спасения до конца низложившая; Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 7

Хотение святаго Хрисогона, еже умерети за Христа,— исполнися Божиим Промыслом: егда же узрела еси честныя мощи своего учителя стратотерпца, любезно их лобызаючи, восплакалася еси, из глубины души износящи Богу песнь: Аллилуиа.

Икос 7

Новую благодать и силу дарова тебе Господь наш, егда восприяла еси подвиг преходити из града в град, посещающе во узах сидящих. Мы же, последующе странствованию твоему, умильно вопием ти: Радуйся, последовательнице

стопам Христовым; Радуйся, служительнице многим святым. Радуйся, чистотою уневестившаяся Христу; Радуйся, великомученице прославленная. Радуйся, узорешительнице проимено-ванная; Радуйся, златом твоим купующая свободу верным от уз темничных. Радуйся, молитвами твоими избавляющая нас уз греховных; Радуйся, врачевание больным низпосылающая. Радуйся, Божиим велением полумертвых возставляющая; Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 8

Странствование твое со святою мученицею Феодотиею многим ослабу подаде: болящим дарова исцеление, многим умершим уготова погребение, живым на вящшия подвиги добродетели укрепление; нас же недостойных сподоби, святая, молитвами твоими пети разумно Богу: Аллилуиа.

Икос 8

Весь храмины темницы исполнися многим плачем и рыданиями твоими, егда рано притекши в ню по обычаю твоему и не единого же обретши от узник, за Имя Христово всажденных, вси бо в ночь едину повелением злочестиваго царя смерти преданы быша; мы же, вспоминающе скорбь твою о друзех Божиих, взываем тако: Радуйся, со усердием поискавшая в темницах рабов Христовых; Радуйся, паки обретшая тех в Небесных Селениях. Радуйся, взявшая с любовью на рамо свое крест Господень; Радуйся, сподобльшаяся всюду зрети разумными очесы Господа Вседержителя. Радуйся, за любовь твою к ближним велие дерзновение к Богу стяжавшая; Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 9

Нечестивии мучителие совет сотвориша на тя, страстотерпице непобедимая, хотяще приклонити тя ко идольскому служению; ты же небоязненно зывала еси к ним: “Раба Христова есмь, и пою Ему день и ночь: Аллилуиа”.

Икос 9

Витийствова с тобою начальнейший жрец идольский, хотяй лестию уловити святую душу твою; ты же, познавше всю хитрость вражию, посрамила еси мучителя и пременила вся злая во благая, безтрепетно взираючи на орудия мучительския и на вся муки; мы же, дивящися мужеству твоему, зовем ти умиленными гласы: Радуйся, добровольно оставившая вся мира сего красная; Радуйся, возжелавшая прияти различныя муки за Христа. Радуйся, с любовью на смерть идти возхотевшая; Радуйся, и самех мучителей терпением твоим удивившая. Радуйся, страданиями твоими Церковь Христову украсившая; Радуйся, демоны ногама твоима поправшая. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 10

Спастися всем хотящим людям споспешествуй молитвами твоими, великомученице, пред Господем и испроси разрешение грехов почитающим страдания твоя, да вопием с тобою: Аллилуиа.

Икос 10

Царя Небеснаго возлюби всем сердцем своим святая Анастасия и в темницу ввержена бысть за Сладчайшаго Иисуса, надолзе голодом и жаждою истаявающи и молитвою укрепляющися; темже прославляюще тоя честная страдания, возсылаем к ней пение таковое: Радуйся, последовательнице страстем Христовым; Радуйся, украсившаяся победоносною славою. Радуйся, благочестивым женам похвало и величание; Радуйся, земною темницею в Небесный Чертог востекшая. Радуйся, тамо с мученики водворившаяся; Радуйся, молитвою твоею у Престола Божия воспоминающая нас. Радуйся, узы греховныя скоро разрушающая; Радуйся, демоны от человек прогоняющая. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 11

Пение всеумиленное приносим ти, прославляюще твоя за Христа страдания, и молим тя: святая страсотерпице, испроси у милостиваго Господа всем людем здравие, долгоденствие и на враги победу и одоление. Нам же, восхваляющим мучения твоя, подаждь мир и спасение, да поем Богу во веки: Аллилуиа.

Икос 11

Светлым и радостным лицом последовала еси на страдание, уготованное ти от мучителей, еже помышляюще с радостию зовем: Радуйся, от потопления в мори Божиим смотрением избавльшаяся; Радуйся, протяженная мучители к четьрем столпом и тем уподобльшаяся Распятому на Кресте Сыну Божию. Радуйся, жегомая огнем даже до смерти; Радуйся, сокровищнице исцелений неоскудная. Радуйся, чаше даров Божиих преизобильная; Радуйся, всех благих желаний скорая исполнительнице. Радуйся, всеблаженная великомученице Анастасие, узников святая посетительнице и молитвеннице о душах наших.

Кондак 12

Благодать свыше ниспосли всем нам, притекающим с любовию к раце мощей твоих, и испроси у Господа прощение согрешений наших, болящим же и страждущим исцеление, да благодарственно вси вопием дивному во святых Богу: Аллилуиа.

Икос 12

Поюще подвиги твоего вольного мучения за Христа, поклоняемся страданию твоему, великомученице досточудная, почитаем святую кончину твою и молим тя, простри твою с небесе помощь и на нас, живущих во тьме страстей и искушений и вопиющих ти: Радуйся, великомученице святая, принеся тело свое в богоприятную жертву во многообразных мучениях; Радуйся, горлице, взлетевшая во Иерусалим Вышний. Радуйся, чистая и непорочная невеста Христова; Радуйся, кадиланице духовная, фимиам молитвы о нас к Богу приносящая. Радуйся, почитающим память твою и страдания твоя богоугодного жития зеркало; Радуйся, болезни душевные и телесные скоро исцеляющая. Радуйся, светлый образе жития всем, чающим улучшить христианскую кончину; Радуйся, всеблаженная велико-мученице Анастасие, узников святая посетительнице и молитвеннице о душах наших.

Кондак 13

О многострадальная и предивная, святая великомученице Анастасие! Нынешнее наше малое моление приими от недостойных раб твоих, с любовью приносимое тебе, и испроси нам у Христа Бога греховных уз разрешение, да избавимся молитвами твоими гнева Божия и вечного осуждения, и да удостоимся в Небесном Царствии купно с тобою во веки пети Богу: Аллилуиа.

(Этот кондак читается трижды, затем икос 1 и кондак 1)